

Robba e Calabria nostra

Poesie in dialetto calabrese

Ogni riferimento a fatti realmente accaduti e/o a persone realmente esistenti è da ritenersi puramente casuale.

Damiano Mamone

ROBBA E CALABRIA NOSTRA

Poesie in dialetto calabrese

BOOK
SPRINT
E D I Z I O N I

www.booksprintedizioni.it

Copyright © 2024
Damiano Mamone
Tutti i diritti riservati

“Io” – 1° parte

Signuri mi presentu,
Su Mamone Damianu.
Mi lagnu non mi pentu,
Cittadinu italianu.

Di sangu calabrisi,
Ca nascivi accusi
L'ottu iennaru è lu misi,
Di lu cinquantatrì.

Fabrizia è lu paisi,
Ai tempi Catanzaru,
Ma dopu anni e misi,
A Vibbu u collocaru.

Duoppu la chiesi randi,
Vai pi la maraccìcca,
Comu leggi cumandi,
La via esti: Petru Micca.

Fu Gianni di lu tundu,
Cca a Jiemma avia nu fundu,
Modestu culturatu,
Ma onestu e rispettatu.

La mamma era 'Ntonetta,
O Marianna assai curretta
La moccara ingiuriata,
Caratteri pipata.

Io quartu di sei figghioli,
Quattru soru e du frati,
Ca mamma e patri voli,
E nui 'ndi simu grati.

'Ntonuzza poi Rosina,
Poi Cosimu e Damianu,
Raffella e Celestina,
Au tempu ormai luntanu.

Li scoli elementari,
Fici a Nardudipaci,
Paisi vista mari,
Ma assai nivi si faci.

Duoppu li scoli medi,
Simu a l'aduliscenza,
A Fabrizia pua cedi,
Ca inizia la partenza.

In Germania jia sperandu,
C'è lu bellu vidiri,
Ca l'atri riturnandu,
Dicianu cu piaciri:
«Esti nu paradisu,
Guadagni assai dinari,
Lavuru senza pisu,
E beni ad'ogni stari».

Partia cu na valici,
Diciottu marzu sessantanovi,
Ma a verità chi fici,
Subendu tanti provi.

Du capu, du lavuru,
Di lu friddu e di lu scuru,
E di poca sperienza,
A voti negligenza,

Chianu chianu praticai,
Lingua e vita imparai,
Ca sugnu genti boni,
Chidi anglusassòni.

È verità concreta,
È parti da vita mia,
Non c'è parti segreta,
Sulu na poesia.

“A Roberta”

Chidu chi sentu in cori,
Lu dicu e mi diletту,
Lu dedicu a Roberta,
Cu amuri e tantu affettu.

All’ottu u misi giugnu,
Ai deci da matina,
Tuttu cuntentu sugnu,
Mi nasci na bambina.

‘Nte panni no stacià,
Di corsa da matina,
Mi scappu pe mu vidu
A bella Robertina.

Li hiuri ci ccattai,
Ma i hiuri già l’avia,
Ca hiuri stupendu assai,
È Robertina mia.

Da gioia poi u duluri,
Pensandu comu fazzu,
Nascendu o mei signuri,
Si stroppijau nu vrazzu.

Ma duoppu pocu iorni,
E ringraziandu Dio,
La gioia mi ritorni,
Du mali ’nci guarriu.

Quandu arrivai a Marina,
Mi dissiru: «Che bella,
Vivaci e piccolina,
Ma è davveru na stella».

Finiru li vacanzi,
Dopu trè simani,
No chiù ristoru anzi,
Ritornu a Lumezzani.

Passatu u terzu misi,
N'atra preoccupazioni,
Ma già bona si 'ntisi,
È le vaccinazioni.

Mo a parguletta età si la gistisci,
Ma pi nno mmu avi mali,
Ci auguru mu crisci
Cu mete spirituali.

Ca tegnu tantu a chissu,
E sugnu preoccupatu,
Ca u mundu è 'nta l'abissu,
E malu cumbinatu.

Gesù e primi cristiani,
A tutti 'ndi strujù,
Lu modu mu lu sani,
È sulu u regnu di Dio.

“U niputinu”

U misi è dicembri,
U friddu è vernu nchinu,
Che veru non mi sembri,
Mi nasci u nipotinu.

U patri raggiunava,
La mamma riflettìa,
Infini cuncurdava:
«Chiamamulu Mattia».

L’attesa si fa longa,
Continu no si senti,
Finchè nutizia giunga,
È natu finalmenti.

Partimmu cu premura,
Tutti pi lu spitali,
Ma non c’è chiù pagura,
Che è natu, menu mali.

Patri mutu restau,
Tanta di l’emozioni,
Ma duoppu murmurau:
«È già nu capilloni».

Ognunu guarda e dici:
«Guarda quantu esti bellu
La mamma chi lu fici:
È lu primu giuiellu».

L’amici su cuncordi,
Tutti pa regalia,
Ma zìu non avi sordi
E fa la poesia.

La vita eterna auguru,
A stu niputi mio,
Pecchè sugnu sicuru,
Ca la prumisi Dio.

“L’arrestu”

U quindici di giugnu,
Ai cinqu a casa mia,
Giubbotti e armi in pugnu,
Irrumpi a polizia.

Giramu e chi trovamu,
Avimu a sequestrari,
Ca mandatu purtamu,
Custodia cautelari.

Di nuvuli cadia
E dissi: «Un ssacciu nenti»,
Cunvintu rispundìa:
«Su vittima innucenti».

Giraru supasutta casseti e divani,
Trovaru in casa tutta,
Pubblicità cristiani.

Di Geova su testimoni,
Cunvintu rispundìa,
Paroli sani e boni,
Ma nudu si cunvincìa.

Duoppu ricerca vana,
Circa tri quarti dura,
Dissi cu vuci strana:
«Seguiteci in questura».

U luocu si trovava,
A na certa distanza,
Di chissu apprufittava,
Dandu testimonianza.